

22 DEC 1998
Time-Mahathir/I
TIME PILIH MAHATHIR PENCETUS BERITA ASIA 1998

KUALA LUMPUR, 22 Dis (Bernama) -- Perdana Menteri Datuk Seri Dr Mahathir Mohamad telah dinamakan oleh majalah Time sebagai Pencetus Berita Asia bagi 1998.

"Tidak ada siapa yang menarik liputan berita dengan begitu hebat tahun ini berbanding Dr M -- dan itu menjadikan beliau Pencetus Berita bagi 1998," kata majalah berita paling utama di dunia itu dalam keluaran terbarunya.

Time menyifatkan Perdana Menteri yang mencapai usia 73 tahun dua hari lepas sebagai cergas, moden, cepat mengenal punca dan mampu memulih.

"Selain membentuk pelan tindakan kebangsaan yang kukuh, Dr Mahathir sendiri telah memilih kelengkapan bagi bilik air di Menara Petronas di Kuala Lumpur, bangunan tertinggi di dunia," katanya.

Majalah itu juga melaporkan mengenai tindakan Dr Mahathir memecat timbalannya Datuk Seri Anwar Ibrahim pada September lepas, rusuhan yang berlaku kemudiannya dan kawalan dalam tukaran bagi mata wang Malaysia.

"Beliau menyedarkan dunia bahawa kapitalisme tanpa kawalan mungkin tidak sesuai bagi semua negara -- satu konsep yang diakui seluruh dunia sejak Mahathir mula bercakap mengenai konspirasi spekulator dan pakatan kewangan Yahudi sejak setahun lepas," katanya.

Menurut majalah itu, Malaysia menikmati perubahan yang besar sejak setahun lepas dan semasa kesan krisis ekonomi mula dirasai, negara ini nampaknya lebih mampu menanganinya berbanding jiran-jirannya yang turut terjejas.

Time juga berkata ramai berpendapat "pertarungan" antara Dr Mahathir dan Anwar belum tamat.

Menurutnya nasib Dr Mahathir bukannya bergantung kepada perbicaraan rasuah dan salah laku seks Anwar tetapi kepada ekonomi.

"Jika beliau berjaya, beliau akan memberi semangat kepada yang lain yang bimbang mengenai keterlaluan kapitalisme. Untuk 16 tahun, beliau menyediakan kepada kami pembangunan yang mengagumkan, kemakmuran dan kekayaan yang dikongsi," Time memetik kata-kata Paddy Bowie, seorang rakyat asing yang memilih menjadi warga negara Malaysia dan yang mengenali Dr Mahathir selama 30 tahun.

Majalah itu berkata peristiwa pada 1998 telah menarik tumpuan terhadap era Dr Mahathir dan kelantangan beliau telah meletakkan Malaysia, malahan negara-negara maju, dalam peta dunia.

-- BERNAMA
AU MAI